



BOSNIA AND HERZEGOVINA
MINISTRY OF COMMUNICATIONS AND TRANSPORT



Broj: UP1:01-50-2-1071-1/23
Sarajevo, 14.03.2023. godine

Na osnovu člana 14. stav (2) Zakona o slobodi pristupa informacijama u Bosni i Hercegovini („Službeni glasnik BiH“, br. 28/00, 45/06, 102/09, 62/11 i 100/13), a u vezi sa članom 193. Zakona o upravnom postupku („Službeni glasnik BiH“, br. 29/02, 12/04, 88/07, 93/09, 41/13 i 53/16), rješavajući po zahtjevu Muhidina Ćuprije iz Sarajeva za slobodu pristupa informacijama od 27. 2. 2023. godine, šefica Kabineta - savjetnik ministra komunikacija i prometa Bosne i Hercegovine, po ovlaštenju ministra komunikacija i prometa Bosne i Hercegovine broj 04-07-2-371/23 od 9. 2. 2023. godine, donosi

R J E Š E N j E
o slobodi pristupa informacijama

Muhidinu Ćupriji iz Sarajeva odobrava se pristup informacijama po zahtjevu od 27. 2. 2023. godine.

O b r a z l o ž e n j e

Muhidin Ćuprija iz Sarajeva obratio se 27. 2. 2023. godine Ministarstvu komunikacija i prometa Bosne i Hercegovine (u daljnjem tekstu: Ministarstvo) zahtjevom za slobodu pristupa informacijama u skladu sa odredbama Zakona o slobodi pristupa informacijama u Bosni i Hercegovini („Službeni glasnik BiH“, br. 28/02, 45/06, 102/09, 62/11 i 100/13, u daljnjem tekstu: Zakon).

U zahtjevu je navedeno da se traži pristup sljedećim informacijama, odnosno *dostava informacija koje se odnose na pitanje pravnog sljedništva iza Fonda za puteve SR BiH i SIZ-a za puteve SR BiH, kao i osnovanosti donošenja Zakona o osnovama sigurnosti saobraćaja na putevima u Bosni i Hercegovini („Službeni glasnik BiH“, br. 06/06, 75/06, 44/07, 84/09, 48/10, 18/13, 8/17, 89/17, i 9/18), Zakona o izmjenama i dopunama Zakona o ministarstvima i drugim organima uprave Bosne i Hercegovine („Službeni glasnik BiH“, br. 103/09), Pravilnika o vođenju evidencije o javnim putevima i objektima na njima („Službeni glasnik BiH“, broj 13/07), Pravilnika o načinu prikupljanja i obradi statističkih podataka o saobraćajnim nezgodama („Službeni glasnik BiH“, broj 71/16) te sporazuma i strategija koji su vezani za predmetnu materiju s obzirom da Ministarstvo nije pravni sljednik Fonda za puteve SR BiH i SIZ-a za puteve SR BiH.*

U skladu sa članom 11. Zakona, utvrđeno je da je zahtjev uredan.

Postupajući po predmetnom zahtjevu, Ministarstvo je u skladu sa članom 14. stav (1) Zakona i Vodiča o slobodi pristupa informacijama broj: 01-04-50-2-3460/12 od 28. 5. 2012. godine poduzelo sve potrebne radnje kako bi prikupilo tražene informacije i razmotrilo sve činjenice i okolnosti koje su značajne za obradu predmetnog zahtjeva.

U konkretnom postupku, obavještava se podnositelj zahtjeva da je članom III stav 1. Ustava Bosne i Hercegovine propisano da su u nadležnosti institucija Bosne i Hercegovine sljedeća pitanja:

- a) vanjska politika
- b) vanjskotrgovinska politika
- c) carinska politika
- d) monetarna politika, kao što je predviđeno članom VII
- e) finansiranje institucija i međunarodnih obaveza Bosne i Hercegovine
- f) politika i reguliranje pitanja imigracije
- g) provođenje međunarodnih i međuentitetskih krivičnihopravnih propisa, uključujući i odnose sa Interpolom
- h) uspostavljanje i funkcioniranje zajedničkih i međunarodnih komunikacijskih sredstava
- i) reguliranje međuentitetskog prometa
- j) kontrola zračnog prometa

U stavu 3. tačka a) propisano je da sve vladine funkcije i ovlaštenja koja nisu ovim Ustavom izričito povjerena institucijama Bosne i Hercegovine pripadaju entitetima.

Član IV stav 4. Ustava Bosne i Hercegovine propisuje da je Parlamentarna skupština Bosne i Hercegovine, između ostalog, nadležna i za donošenje zakona potrebnih za provođenje odluka Predsjedništva ili za izvršavanje nadležnosti Skupštine po ovom Ustavu.

Procedura donošenja zakona je propisana članom IV stav 3. Ustava Bosne i Hercegovine na način da sve zakonodavne odluke moraju odobriti oba doma, što je slučaj i sa donošenjem Zakona o osnovama sigurnosti prometa na cestama u Bosni i Hercegovini i Zakona o izmjenama i dopunama Zakona o ministarstvima i drugim organima uprave Bosne i Hercegovine.

U skladu sa Zakonom o upravi („Službeni glasnik BiH“, br. 32/02, 102/09 i 72/17) rukovoditelji organa uprave donose propise s ciljem omogućavanja izvršavanja zakona i drugih propisa iz nadležnosti organa uprave kojim rukovode, kada su za to zakonom ovlašteni (član 16.).

Podsjećamo da je ministar komunikacija i prometa Bosne i Hercegovine donio pomenute pravilnike u skladu sa zakonskim ovlaštenjima i u skladu sa propisanim procedurama.

Postupak zaključivanja i izvršavanja međunarodnih ugovora propisan je Zakonom o postupku zaključivanja i izvršavanja međunarodnih ugovora („Službeni glasnik BiH“, br. 29/00 i 32/13). Ministarstvo ističe da je prilikom zaključivanja sporazuma navedenih u predmetnom zahtjevu za pristup informacijama ispoštovana procedura propisana navedenim zakonom.

U vezi sa konstatacijom iz predmetnog zahtjeva da su „entiteti i Brčko distrikt Bosne i Hercegovine donijeli neustavne zakone i protivno odlukama Ustavnog suda o javnim dobrima naveli da su oni vlasnici nekretnina“, ukazujemo da je, u skladu sa članom VI stav 3. tačka a) Ustava Bosne i Hercegovine, Ustavni sud jedini nadležan da odluči je li bilo koja odredba ustava ili zakona jednog entiteta u skladu sa Ustavom Bosne i Hercegovine.

U skladu sa navedenim, odlučeno je kao u dispozitivu ovoga rješenja.

Uputstvo o pravnom lijeku: Protiv ovog rješenja dozvoljena je žalba Žalbenom vijeću pri Vijeću ministara Bosne i Hercegovine u roku od 15 dana od dana njegovog prijema.

U slučaju da podnositelj zahtjeva nije zadovoljan postupanjem ovog organa, ima pravo obraćanja Ombudsmenu za ljudska prava Bosne i Hercegovine, Akademika Jovana Surutke 13, 78 000 Banja Luka.



Dostavljeno:

- Muhidin Ćuprija, Porodice Ribar 67/2, 71 000 Sarajevo;
- spis predmeta;
- a/a.